

四庫全書

集部

欽定四庫全書

集部

元詩選初集卷

首至二

詳校官中書臣王鵬

主事銜臣徐以坤覆勘

總校官編修臣王燕緒

校對官檢討臣溫常綬

謄錄監生臣暴暄

欽定四庫全書

集部八

元詩選

總集類

提要

臣等謹案元詩選初集六十八卷卷首一卷
二集二十六卷三集十六卷

國朝顧嗣立編嗣立字俠君長洲人康熙壬辰
進士改庶吉士是選凡三集每集之中又以
十干分為十集而所謂癸集者有錄無書故

皆止於九集焉初集所錄自帝王別為卷首
外元好問以下凡一百家二集所錄段克己
弟兄以下凡一百家三集所錄麻革以下凡
一百家每人各存原集之名前列小傳兼品
其詩雖去取不必盡當而網羅浩博一一採
自本書具見崖畧非他家選本餽釘綴合者
可比有元一代之詩要以此本為鉅觀矣嗣
立稱所見元人之集約四百餘家方今

詔採遺書海內祕藏無不輻輳中間為嗣立所未
見者固指不勝屈而嗣立所見今不著錄者
亦往往有之蓋相距五六十年隱者或顯而
存者亦或偶佚殘膏賸馥轉藉是集以傳則
其功亦不可沒矣乾隆四十六年十月恭校
上

總纂官臣紀昀臣陸錫熊臣孫士毅

總校官臣陸費墀

欽定四庫全書

元詩選初集卷首

廢吉士顧嗣立編

文宗皇帝

自集慶路入正大統途中偶吟

穿了襍衫便著鞭一鉤殘月柳梢邊
二三點露滴如雨六七箇星猶在天
犬吠竹籬人過語雞鳴茅店客驚眠
須臾捧出扶桑日七十二峯都在前

望九華

昔年曾見九華圖為問江南有也無今日五溪橋上見
畫師猶自欠工夫

順帝

贈吳王

金陵使者過江來漠漠風煙一道開王氣有時還自息
皇恩無處不周回莫言率土皆王化且喜江南有俊才
歸去丁寧頻屬付春風先到鳳皇臺

元詩選初集卷首

欽定四庫全書

元詩選初集卷一

庶吉士顧嗣立編

元好問遺山集

好問字裕之太原秀容人七歲能詩有神童之
目年十四從陵川郝天挺學六年而業成下太
行渡大河為箕山琴臺等詩禮部趙秉文見之
以為近代無此作也于是名震京師謂之元才
子金宣宗興定三年登進士第不就選往來箕

穎者數年除南陽令調內鄉歷尚書省掾左司
都事員外郎天興初入翰林知制誥金亡不仕
元世祖在藩邸聞其名將以館閣處之未用而
卒年六十有八世稱遺山先生先生天才清贍
邃婉高古沈鬱太和力出意外功縟而不見斧
鑿新麗而絕去浮靡雜弄金碧揉飾丹素奇芬
異彩動蕩心魄以五言為雅正而出奇于長句
雜言樂府不用古題新意特出歌謠慷慨挾幽

并之氣晚年尤以著作自娛謂金源氏實錄在
順天張萬戶家國亡史興已所當任乃言于張
願為撰述人或沮之先生曰不可使一代之迹
泯而不傳乃構亭于家名曰野史采摭所聞以
寸紙細字輒為記錄至百餘萬言世所傳者詩
文集外有中州集壬辰雜編及杜詩學東坡詩
雅錦機詩文自警等書自中原板蕩風雅道衰
汴京之亡故老都盡先生蔚為一代宗工以文

金方里人
卷一
章獨步者幾三十年由是學者知所指歸作為
詩文皆有法度百年以還名家輩出別裁偽體
溯流窮源論者以先生為標準不亦宜乎

箕山

幽林轉陰崖鳥道人迹絕許君棲隱地唯有太古

一作荒

雪人間黃屋貴物外祇自潔尚厭一瓢喧重負寧所屑
降衷均義稟汨利忘智決得隴又望蜀有齊安用薛千
戈幾蠻觸宇宙日流血魯連蹈東海夷齊

一作叔

采薇蕨

至今陽城山衡華兩丘垤古人不可作百念肝肺熱浩
歌北風前悠悠送孤月

緱山置酒

同內翰馮丈叔獻雷兄
希顏賦詩分韻得賓字

靈宮肅清曉細柏含古春人言王子喬鶴馭此上賓白
雲山蒼蒼平田木欣欣登高覽元化浩蕩融心神西望
洛陽城大路通平津行人細如蟻擾擾爭紅塵蓬萊風
濤深鬢毛日夜新殷勤一杯酒媿爾雲間人

光武臺

東南地上游荆楚兵四衝遊子十月來登高送長鴻當年赤帝孫提劍起蒿蓬一顧潢水斷再顧新都空雷霆萬萬古青天看飛龍歸然此遺臺落日荒煙重誰見經綸初指揮走羣雄白水日夜東石麟幾秋風空餘廣武歎無復雲臺功

潁亭留別

同李治仁鄉張肅子敬王元亮子正分韻得畫字

故人重分攜臨流駐歸駕乾坤展清眺萬景若相借北風三日雪太素秉元化九山鬱崢嶸了不受陵跨寒波

淡淡起白鳥悠悠下懷歸人自急物態本閒暇壺觴負
吟歎塵土足悲咤回首亭中人平林澹如畫

滙亭

春物已清美客懷自幽獨危亭一徘徊翛然若新沐宿
雲淡野川元氣浮草木微茫盡楚尾平遠疑杜曲生平
遠遊賦吟諷心自足竭來著世網抑抑就邊幅人生要
適情無榮復何辱乾坤入望眼容我謝羈束一笑白鷗
前春波動新綠

出京

史院得告歸
嵩山侍下

從宦非所堪長告欣得請驅馬出國門白日觸隆景半
生無根著飄轉如斷梗一昨隨牒來六月阻歸省城居
苦湫隘羣動日蛙黽慙媿山中人團茅遂幽屏塵泥久
免一作相浣一作浣一作夢寐見清潁矯首孤飛雲西南路何永

元魯縣琴臺

荒城草木合破屋風雨侵千年一琴臺睠焉涕盈襟遺
愛食縣社公寧不堪任此臺即甘棠忍使無餘陰旁舍

高以華大豪日捐金蒼雲玄武莫鬼物憑陰岑尚德抑
玄虛隆典誰當尋我興薦寒泉百拜公來臨公來不能
知落日下饑禽懷哉空山裏鶴飛猿興吟當年于為歌
補袞一何深承平示得意獨能正哇淫君相此一時又
復悟良箴諛臣坐廢黜盍亦起幽沈蒲輪竟願輟香草
空深林寂莫授書室孤甥舉遺衾生平諒已然薄俗矧
來今千山為公臺萬籟為公琴夔曠不竝世月露為知
音人間蹠跖耳已矣非公心

元道州文編以元魯山為
元魯縣又臺今為玄武祠

故及之

古意二首

七歲入小學十五學時文二十學業成隨計入咸秦秦
中多貴遊幾與書生親年年抱關吏空笑西來頻在昔
學語初父兄已卜鄰跛鼈不量力強欲緣青雲四十有
牧豕五十有負薪寂寥抱玉獻賤薄倡優陳青衫亦區
區何時畫麒麟遇合僅一二饑寒幾何人誰留章甫冠
萬古徒悲辛

桃李弄嬌嬈梨花澹丰容盈盈兩無語
觴觴爭春風春風何許來草木誰青紅
天公亦老矣何意夸兒童昨朝花正開
今朝花已空川流不肯駐并與繁華東
梗楠干歲姿骯髒空谷中陽和不擇地
亦復難為功本無兒女心安用尤天公

贈荅劉御史雲卿

學道有通蔽今人乃其尤溫柔與敦厚
埽滅不復留高蹇當父師排擊劇寇讐
真是未可必自私有足羞古人

相異同寧復操戈矛春風入萬物枯枿將和柔克已未
有加歸仁亦何繇先儒骨已腐百罵不汝酬胡為文字
間刮垢搜癰疣吾道非申韓哀哉涉其流大儒不知道
此論信以不我觀唐以還斯文有伊周開雲揭日月不
獨程張儔聖途同一歸論功果誰優戶牖徒自闢

一作開

膠漆本易投九原如可作吾欲起韓歐

送欽叔內翰并寄劉達卿郎中白文舉編修二首

君性我所諳我心君所知凡我之所短君亦時有之謀

事恨太銳臨斷恨太遲持論恨太高徇俗恨太卑人道
自近始貧富理不齊君自不得飽欲療何人饑乞醯乞
諸鄰聖哲有明譏被髮抹鄉人智者所不為且如與人
交交有非所宜白黑不復擇豁豁傾心脾汎愛豈不可
後悔終自貽又如與人言寧復無失辭刺口論成敗白
眼談歌詩世故發黃間能不發其機聞君作損齋似覺
豪華非慊忿與室慊百年有良規與子各努力歲晚以
為期

古人遙相望每恨不同時同時得古人歡樂良在茲君
歸豈不佳交遊滿京師門前車馬來笑言慰所思細話
洛陽事高詠嵩山詩宮壺發新篳宮梅耿耿幽姿故應劉
與白亦復念微之

飲酒五首

襄城作

西郊一畝宅閉門秋草深牀頭有新釀意愜成孤斟舉
杯謝明月蓬蓽肯相臨願將萬古色照我萬古心

去古日已遠百偽無一真獨餘醉鄉地中有羲皇淳聖

教難為功乃見酒力神誰能釀滄海盡醉區中民

利端始萌芽忽復成禍根名虛買實禍將相安足論驅

驢上邯鄲逐兔出東門離官寸亦樂里社有拙言

離官寸亦

樂晉俚
諺云然

萬事有定分聖智不能移而於定分中亦有不測機人

生桐葉露見日忽已晞唯當飲美酒儻來非所期

此飲又復醉此醉更酣適徘徊雲間月相對澹以默三

更風露下巾袖警微溼浩歌天壤間今夕知何夕

後飲酒五首

陽翟作

少日不能觴少許便有餘此得酒中趣日與杯杓俱一日不自澆肝肺如欲枯當其得意時萬物寄一壺作病知柰何妾婦良區區但媿生理廢饑寒到妻孥吾貧蓋有命此酒不可無

金丹換凡骨誕幻若無實如何杯杓間乃有此樂國天生至神物與世作酣適豈曰無妙理澠漾莫容詰康衢吾自樂何者為帝力大笑白與劉區區頌功德

客從崧少來貽我招隱詩為言學仙好人間竟何為一笑顧客言神仙非所期山中如有酒吾與爾同歸

酒中有勝地名流所同歸人若不解飲俗病從何醫此語誰所云吾友田紫芝紫芝雖吾友痛飲真吾師一飲三百杯談笑成歌詩九原不可作想見當年時

飲人不飲酒正自可飲泉飲酒不飲人屠沽從擊鮮酒如以人廢美祿何負焉我愛靖節翁於酒得其天龐通何物人亦復為陶然兼忘物與我更覺此翁賢

少林

雲林入清深禪房坐蕭爽澄泉潔餘習高鳥喚長往我
無玄豹姿漫有紫霞想回首山中雲靈芝日應長

劉曲龍潭

一無劉
曲二字

層冰積浩蕩陵谷低吞吐窈窕轉幽壑突兀開淨宇回
頭山水縣亦復墮塵土孤雲鐵梁北宇宙一仰俛風景
初不殊川塗忽修阻寒潭海眼淨黝黑自太古蟄龍何
年卧萬國待霖雨誰能裂蒼崖雷風看掀舉

山中人歲
旱則轉大

石入潭中以駭龍
瞬息致雨故云

麥歎

借地乞麥種傲倖今年秋乞種尚云可無丁復無牛田
主好事人百色副所求盼盼三百斛寬我饑寒憂我夢
溱南川平雲綠油油起來望河漢旱火連東州四月草
不青吾種良漫投田間一太息此歲何時周向見田父
言此田本良疇三歲廢不治平聲種則當倍收如何落落吾
手羊年變雞猴身自是早母咄咄將誰尤人滿天地間

天豈獨吾讐正以賦分薄所向因拙謀不稼且不穡取
禾亦何繇辦作高敬通惡雨將漂流吾貧有濫觴賢達
未始羞單衣適至骨一劍又蒯緱焉知寄食餓不取丞
相俟作詩以自廣時用商聲謳

龍門雜詩

石樓繞清伊塵土天所限人言無僧久草滿不復剡灘
聲激悲壯山意出高蹇當年香山老挂冠遂忘返高情
留詩軸清話入禪版誰言海山去蕭散仍在眼溪寒不

可涉倚杖西林晚

豐山懷古

豐山一何高，古屋蒼煙重。
開門望吳楚，鳥去天無窮。
連山橫巨麓，白水亘長虹。
川原鬱佳氣，自古南都雄。
炎精昔季興，卧龍起隆中。
落落出奇策，言言揭孤忠。
時事有可論，生晚恨不逢。
漢賊不兩立，大義皎日同。
吳人操等耳，忍與分河潼。
奪操而與權，何以示至公。
一民漢遺黎，尺地漢故封。
守民及守土，天地與相終。
不能禦寇讐，顧

以寇自功既異鴻溝初又非列國從一券捐一作半產

二祖寧汝容端本一已失孤唱誰當從至今有遺恨廟

栢號陰風舊聞清泠淵天籟如撞鍾山徑野人語誕幻

欺孩童開元有亂階鹿飲溫泉宮黃猿何為者乃爾能

嘯允乾坤之大音久鬱理當通清霜旦夕落佇爾驚羣

聾

孔明自謂漢室季興清泠淵黃猿出見廟碑述開元事

乙酉六月十一日雨

一旱近兩月河洛東連淮驕陽佐大火南風卷黃埃草

樹青欲乾四望令人哀時時怪事發雨雹如李梅我夢
天河翻崩騰走雲雷今日復何日駛雨東南來元氣淋
漓中焦卷意已迴良苗與新穎鬱鬱無邊涯書生如老
農苦樂與之偕閭閻聞古語一笑心顏開酉年酒如漿
乾溢安能裁一作裁惟當作高廩多具尊與壘家人笑問
我君田安在哉駛雨與快同音見魏志

觀浙江漲

浙水今在鄞陽見水經注非浙江也

一旱千里赤一雨垣屋敗浙故以江名暴與衆壑會初

驚沙石卷稍覺川谷隘雷風入先驅大塊供一噫千帆
鼓前浪萬馬接後派崩崖不暇顧拔木無留礙憑陵如
藉勢洄洑各有態平分乍舒徐怒觸忽碎壞雲蒸楚樹
杪雪映商嶺背髣髴千丈潮悅與海門對攸飛鬪蛟鱷
燃犀出鱗介陽侯富陰族萬首露光怪翠蕤澹偃蹇鉦
鼓亂砲礮永懷疏鑿力重歎神禹大乾坤海為壑未礙
變橫潰納汙非無處流惡聊自快投詩與龍盟滌蕩煩

一再

時拜大赦
五日矣

鸛雀崖北龍潭

層崖閼頑陰水木深以阻湍聲半空落洶洶如怒虎風
生木葉脫魄動不敢語何年渾沌竅靈物此棲處初從
一綫溜開鑿到神禹雲雨鼓飛浪噴薄齊萬弩藏珠驪
龍頷百斛快一吐油油入無底細散不濡縷歸藏海有
穴汎溢愁下土南峰天一柱萬古鎮幽府江山有奇探
落景迫行旅多慙茹芝人終年看飛雨

五松平

竹港晨露白石門秋氣寒湍流落澗壑細路深茅管江
平白石出竟日沿清灣四顧不見人山鳥時間闌蒼崖
入地底煙靄青漫漫力盡不能過却坐空長歎青天白
雲間可望不可攀虛名竟何得行路乃爾難

贈荅楊煥然

詩亡又已久雅道不復陳人人握和璧燕石誰當分關
中楊夫子高誨世所聞十年玄尚白藜藿甘長貧有來
河水篇四海付斯文斯文有定在桓生知子雲古來知

已難萬里猶比鄰
千人國中和要非
心所親東楚西南
秦望君勞我神
相逢不得語別去
徒殷勤白雲不可
贈
相思秋復春

送詩人李正甫

陽和入枯株
靄靄含芳津
山頭太古石
不與萬物春
朝從木客遊
莫將山鬼鄰
紫芝僅盈朶
幽蘭不克紉
青雲入長吁
肝膽空輪囷
我嘗讀君詩
天趣觸眼新
秦遊得豪宕
晉產餘真淳
怒虎不受唾
駭鹿未易馴
安坐誰不

如半生走逡巡蒼蒼不可問藐藐誰當親青山碾為塵
白日無閒人空歌東野曲不抹西州貧

曉發石門渡湍水道中

水經湍音專

疎星澹秋明陰霞絢朝映積雨成坐愁晨光動幽興石
門歸馭引湍浦漁舫竝曠蕩萬景新歸藏四山靜平湖
風漪綠遠岸秋沙淨洋洋游魚一作逝汎汎輕鷗泳隱

顯乖夙心感遇

一作寓

見真性倦遊時自悼違已將安竟

憂端從中來茫茫發孤詠

放言

韓非死孤憤虞卿著窮愁長沙一湘纍郊島兩詩囚人
生定能幾肺肝日相讎井蛙奚足論禪蝨良足羞正有
一朝樂不償百年憂古來帝王師或從赤松遊大笑人
間世起滅真浮漚曾是萬戶封不博一掉頭有來且當
避未至吾何求悠悠復悠悠大川日東流紅顏不暇惜
素髮忽已稠我欲升嵩高揮杯勸浮丘因之兩黃鵠浩
蕩觀齊州

黃公廟

羈客無恒居六月走長路清風黃公祠地古欣所遇劍
飛素靈哭龍躍雲雨赴堂堂文成君談笑取帝傳功名
要有命陰相果何預誰謂圯上人異事驚竹素河清不
可俟筋力疲世故袖間一編書塵埃歎遲莫

學東坡移居八首

錄六

誰謂我屋寬寢處無復餘誰謂我屋小十口得安居南
榮坐諸郎課誦所依於西除著僮僕休沐

一作休

得自如

老我於其間兀兀窮朝晡起立足欠伸偃卧足展舒窻
明火焙煖似欲忘凶拘屋前有隙地容舍不可無花開
及菜圃次第當耘鉏東野載家具家具少於車我貧不
全貧尚有百本書

故書堆滿牀故物貯滿箱渾渾商寶鬲纍纍漢銅章杖
飾昭敬恭嚴卯訶痺剛雷文繞杖節獸面出珮璜私印
刻王尊玉斗蛟龍翔逸少留半紙魚網非硬黃亦有墨
首帖不辨作鴈行雪景庵思物宣政舊所藏晉公古漁

父浩歌濯滄浪因覲宮騎圖卧馳識提囊谿石含餘潤
奚墨凝幽香南榮挂風響雲裾珮鏗一作鏘鏘鏡背先秦
書八字環中央讀之三歎息此日何時光

壬辰困重圍金粟論升勺明年出青城瞑目就束縛毫
釐脫鬼手攘臂留空橐聊城千里外狼狽何所託諸公
頗相念餘粒分鳧鶴得損不相償坏土填巨壑一冬不
製衣繒纊如紙薄一日僅兩食強半雜藜藿不羞蓬累
行粗識瓢飲樂敵貧如敵寇自信頗亦慙兒號飯糲空

堅陣為屢却滄溟浮一葉渺不見止泊五窮果何神為
戲乃爾虐

舊隱嵩山陽筍蕨豐餽餉新齋浙江曲山水窮放浪乾
坤兩茅舍氣壓華屋上一從陵谷變歸顧無復望漁樵

一作
樵漁憶往還

一作
還往

風土夢閒曠恍如悟前身姓改心不

忘去年住佛屋盡室寄尋丈今年僦民居卧榻礙盆盎靜
言尋禍本正坐一出妄青山不能隱俛首入羈鞅巢傾
卵隨覆身在顏亦強空悲龍髯絕永負魚腹葬置錐良

有餘終身志悲愴

一作
愴創

國史經喪亂天幸有所歸但恨後十年時事無人知興
廢屬之天事豈盡乖違傳聞入讎敵祇以興罵譏老臣
與存亡高賢死兵饑身死名亦滅義士為傷悲哀哀淮
西城萬夫甘伏尸田橫巨擘耳猶為談者資我作南冠
錄一語不敢私稗官雜家流國風賤婦詩成書有作者
起本良在茲朝我何所營莫我何所思胸中有茹噎欲
得快吐之溼薪煙滿眼破硯冰生髭造物留此筆吾貧

復何辭

此州多寓士論年悉肩隨風波同一舟奚必骨肉為俛
家蓮花白每釀必見貽季昌妙琴事足以相娛嬉郭侯
家多書篇帙得徧窺趙子篤於學間以問所疑王生舊
鄰舍窮達心不移千里訪存歿十口分寒饑獨有仲通
甫天馬不可羈直以論詩文稍稍窺藩籬永懷王與李
朔漠行當歸書來聞吉語報我脫繫維慚非一狐腋不
直五殺皮我作野史亭日與諸君期相從一笑樂來事

無庸知

濟南廟中古檜同叔能賦

亭亭祠宮檜鬱鬱上雲雨扶持幾年造物心獨苦青
餘玉川潤根入鐵岸古雖含棟梁姿斤斧安得取沆湫
地中久駭浪思一鼓天柱屹不移水國奠平土乾坤此
神物甲乙存世譜瀨鄉留耳孫闕里傳鼻祖秦松徒自
汙蜀柏聊共數會待十抱成茲焉重摩拊

別李周卿二首

行路澀於棘，單車望于山。
歌君歸雲曲，清涕留餘潸。
六年河朔州，動輒得謗訕。
惟君篤高義，日來款柴闥。
古交松柏心，今交桃李顏。
古人去不返，古道挽不還。
相思一尊酒，幽恨寄山間。

城居日鼃黽，局促復局促。
去作山中客，放浪誰檢束。
溪光淡於冰，山骨淨如玉。
懷我同心人，團茅住深竹。
垂綸鮮可食，種秫酒亦足。
石壇三萬丈，醉眼天一粟。
安得萬

里風相從，兩黃鵠。

周卿學有淵源，東州詩人未見其比。與予約西游，如詩中所說。

九日讀書山用陶詩露淒暄風息氣清天曠明為

韻賦十詩

錄六

行帳適南下居人踞庭戶城中望青山一水不易渡今
朝川涂靜偶得展衰步蕩如脫囚拘廣莫開四顧半生
無根著筋力疲世故大似丁令威歸來歎墟墓鄉閭喪
亂久觸目異平素粉榆雖尚存歲晏多霜露

山腰抱佛剎十里望家園亦有野人居層崖映柴門昔
我東巖君曾此避塵喧林泉留杖屨歲月歸琴尊翁今

為飛仙過眼幾寒暄蒼蒼池上柳青衫見諸孫疎燈照

茅屋新月入頽垣

二句先
人詩

依依覽陳迹惻愴不能言

宇宙有此山閱世過鳥疾何人不此游名姓寧復識茲
辰世所重前代多盛集柴桑有故事二謝留俊筆并數
孟與桓此外誰記憶人生百年內踏地皆陳迹獨惟我
輩人興懷念今昔山林與泉

一作
泉

壤自古長太息

往年在南都間間主文衡九日登吹臺追隨盡名卿酒
酣公賦詩揮灑筆不停蛟龍起庭戶破壁春雷轟堂堂

金定巳月令言 卷一
髯御史痛飲益精明亦有李與王玉樹含秋清我時最
後來四座頗為傾今朝念存沒壯心徒自驚

我在正大初作吏浙江邊山城官事少日放浙江船菊
潭秋華滿紫稻釀寒泉甘腴入小苦幽光出清妍歸路
踏明月醉袖風翩翩父老遮我留謂我欲登仙一別半
山亭回頭餘十年江山不可越目斷西南天

吾山一何高清凉屹相望龍頭出白堦佛屋壓青嶂雲
先見秋半旭日發豪相我我寶樓閣金界儼龍象鄉曲

二十年香火闕瞻向金花香絲竿夢想雲雨上福田行
欲近重為詩酒障終當陟層巔放眼天宇曠

梨花海棠二首

梨花如靜女寂莫出春莫春工惜天真玉頰洗風露素
月淡相映蕭然見風度恨無塵外人為續雪香句孤芳
忌太潔莫遣凡卉妒

妍花紅粉妝意態工媚嫵窈窕春風前霞衣欲輕舉金
盤渺華屋國豔徒自許依依如有意脈脈不得語詩人

太冷落愁絕殘春雨

題張左丞家范寬秋山橫幅

層崖閼長陰細徑緣絕巘梯雲闌干峻廓廓清眺展斜
陽半天赤飛鳥大江遠清霜張秋氣草樹生意翦風雪
斫堅敵旗旆紛仆偃崢嶸峰巒出莽蒼林薄晚盤盤范
家筆老懷寄高蹇經營入慘淡得處乃蕭散高丘動歸
興突兀青在眼何時卧雲身團茅遂疎嬾

宿張靖田家

地屬壽陽

川涂盡坡陀，嶺路入荒梗。微茫望煙火，向背得廬井。殘
民安樸陋，倦客喜幽屏。兒童聞叩扉，租吏有餘警。兩崖
紛叢薄，砂石立頑獷。湍流落空嵌，百折一作道不容騁。山
深饒風露，夜氣淒以耿。園花淡相望，邊月空照影。深居
苦不早，素髮忽垂領。誰謂林野人，茲焉惜清景。

寶嚴紀行

陰崖轉清深，秋老木堅瘦。城居望已遠，步覺脫氛垢。寶
嚴夙所愛，大室方再叩。曛黑纔入門，逕就石泉漱。遙遙

金門寺寶焰山巖竇我豈無盡公昔見今乃又同來二
三子寢飯故相就况有杜紫微琴筑終雅奏矐矐上初
日深樾炯穿漏逶迤陟西巘萬景若迎候絕壁三面開
仰看勞引脰兩山老突兀屹立柱圓覆諸峰出頭角隨
起隨偃仆不可無煙霞朝暮為先後橫亘連巨壑飛墮
集靈驚九華與奇巧五老失渾厚想當位置初遂欲雄
宇宙太行有缺谷勝絕無出右大似塵外人看字見高
秀哀湍下絕壑電激龍怒鬬崩奔翻雪窖瑩滑瀉瓊甃

窮源得懸流偉觀駭初邁仙人寶樓閣白雨散簷溜天

孫拂機絲素錦絢清晝永懷登高賦意匠

一作頗

困馳驟

窮於游暴秦百說不一售林間太古石稍復杯飲舊已
約銘窪尊細鑒留篆籀茲山緣未了僧夏客宿留終當
勾餘年奇探盡雲岫

鴈門道中書所見

金城留句浹兀兀醉歌舞出門覽民風慘慘愁肺腑去
年夏秋旱七月黍稷吐一昔營幕來天明但平土調度

急星火遁負迫捶楚網羅方高懸樂國果何所食禾有
百膳擇肉非一虎呼天天不聞感諷復何補單衣者誰
子販糴就南府傾身營一飽豈樂遠服賈盤盤鴈門道
雲澗深以阻半嶺逢驅車人牛一何苦

同白兄賦瓶中玉簪

畏景衆芳歇仙葩此夷猶冰姿出新沐娟娟倚清秋昨
夢今見之風鬟玉搔頭誰言閨房秀高情渺林丘碧筵

一作
從
古銅壺一室香四周懷人成獨詠遠思徒悠悠

野史亭雨夜感興

私錄闕赴告求野或有取秋兔一寸毫盡力不易舉衰
遲私自惜憂畏當誰語展轉天未明幽窗響疎雨

繼愚軒和党承旨雪詩二首

今古幾詩人擾擾劇毛粟吾愛陶興韋泠然扣冰玉大
雅久不作聞韶信忘肉求音扣寂莫一歎動鄰屋水風
清鶴夢月露洗蟬腹白頭兩遺編吟唱心自足誰為起
九原寒泉薦芳菊

愚軒具詩眼論文貴天然頗怪今時人雕鐫窮歲年君
看陶集中飲酒與歸田此翁豈作詩真寫胸中天天然
對雕飾真贗殊相懸乃知時世妝粉綠徒爭妍一作
憐枯
淡足自樂勿為虛名牽

寄英禪師師時住龍門寶應寺

我本寶應僧一念墮儒冠多生經行地樹老井未涸一
窮縛兩脚寸步百里難空餘中夜夢浩蕩青林端故人
今何如念子獨輕安孤雲望不及冥鴻杳難攀前時得

君詩失喜忘朝餐想君亦念我登樓望青山山中多詩

人杖屨時往還但苦詩作祟况味同酸寒清涼詩最圓

相和尚往往似方干半年卧牀席瘡我疥亦頑本草松枝條松

脂塗疥頑濟甫詩最苦僧源字濟甫宋州人寸晷不識閒傾身營

一飽船上八節灘安行詩最工慕容安行山陽人臨潼簿六馬鳴和

驚鬱鬱饑寒憂慘慘日在顏老秦詩最和秦畧字簡夫陵川人平

易出深艱脫身豺虎叢白髮罹惻鰥張侯詩最豪前登封令

張效字景賢雲中人驚風卷狂瀾竅繁天和洩外腴中已乾城中

崔夫子

崔遵宇懷祖燕人

老筆鬱盤盤家無儋石儲氣壓風騷

壇我詩有凡骨欲換無金丹呻吟二十年似欲見一斑
大笑揶揄生已復不相寬愛君梅花篇入手如彈丸愛
君山堂句深靜如幽蘭詩僧第一代無媿百年間思君
復思君恨不生羽翰何時溪上石清坐兩蒲團

夢歸

虛庭霜夜寒落葉風自埽恍如南窗月坐失西山道長
安佳麗地遊子自枯槁人生家居樂學稼苦不早衡門

眼中見歸意滿秋草夜長夢已盡愁絕令人老

秋蠶

室人筐中無寸縷一箔秋蠶課諸女朝來飼却上馬桑
隔簇仍聞竹間雨阿容阿璋墨滿面畫徹灰城前致語
上無蒼蠅下無鼠作繭直須如甕許東家追胥守機杼
有桑有稅吾猶汝官家却少一絢絲未到打門先自舉

南溪

南溪酒熟清而醇北溪梅花發興新前年去年花下醉

今年冷落花應嗔梅花娟娟如靜女寂莫甘與荒山鄰
詩人愛花山亦好幽林穹谷生陽春風鬟峨峨一尺雲
芳香幽卧如相親山堂夜半北風惡一點相思愁殺人

范寬秦川圖

張伯玉沒後同
麻徵君知幾賦

亂山如馬爭欲前細路起伏蛇蜿蜒秦川之圖范寬筆
來從米家書畫船變化開闔天機全濃淡覆露清而妍
雲興霞蔚幾千里著我如在我看巔西山盤盤天與連
九點盡得齊州煙浮雲未清白日晚矯首四顧心茫然

全秦天地一大物雷雨瀕洞龍頭軒因山分勢合水力
眼底廓廓無齊燕我知寬也不辦此渠寧有筆如修椽
紫髯落落西溪君長劒倚天冠切雲望之見之不可親
元龍未除湖海氣李白豈是蓬蒿人愛君恨不識君早
乃今得子胸中秦作詩一笑君應聞

予七年前過郾城伯玉知予來而都

無賓主意予亦假塞而去爾後雖願交而髯沒矣未嘗
不以為恨也今日子思兄弟出此圖求予賦詩酒惡無
聊中勉為賦此畫本米元章家物有韓子蒼題名元章
以為中立而元暉以為中正以予觀之此特張髯胸中
物耳知者當不以吾言為過云

寄荅溪南詩老卒愿敬之

五年不喚溪南渡日夕心馳洛西路山中今日見君詩
惆悵良辰又相誤龍蛇大澤變風景虎豹天門鬱煙霧
丈夫不合把鉏犁青鬢無情忽衰素平泉漫作窮愁志
笠澤休題自憐賦

陸龜蒙有
自憐賦

長安正有五侯鯖醢醢誰

能作樓護青燈老屋深蓬蒿蝙蝠掠面莎雞號劒歌夜
半激悲壯松風萬壑翻雲濤區區墓上曹征西我知慚
媿王東皋人生只有一杯酒螟蛉蜾蠃安能豪

西園

興定庚辰
八月
中作

西園老樹搖清秋
畫船載酒芳華游
登山臨水祛煩憂
物色無端生莫愁
百年此地旃車發
易水迢迢鴈行沒

梁門回望繡成堆

時金主遷
都于汴

滿面黃沙哭燕月
熒熒一

炬殊可憐

蒙古破金燕都焚
宮室火一月不滅

膏血再變為灰煙
富貴已

經春夢後典刑猶在

一作見

靖康前當時三山
初奏功三

山宮闕雲錦重璧月
瓊枝春色裏
畫闌桂樹雨聲中秋
山秋水今猶昔
漠漠荒煙送斜日
銅人攜出露盤來
人

生

一作宣

無情淚沾臆麗川亭上看年芳更為清歌盡此

觴千古是非同一笑不須作賦擬阿房

雙峰競秀圖為參政楊侍郎賦

紅煙霏霏雲拂石山木蕭蕭山鬼泣江岸人家失南北
兩峰突兀何許來元氣淋漓洗秋碧畫家晴景費經營
共愛移山入杳冥安得北風吹雨去倚天長劍看崢嶸

二月十五日鶴

九龍岡上玄元祠人言尊像神所遺年年二月降靈鶴

來無定數有定期城頭曉露生新警萬首望穿雲際影
不知濁世誰下臨只許霜毛見修整石壇花落松風冷
戛然長鳴人語定百年鰲老誇見聞萬里黃冠赴靈應
只從游騎突重圍城郭并與人民非可憐侈殿荒煙一作墟
裏無復當年丁令威

閻商卿還山中

阿卿去月從我來今日西山成獨往野人不是城中物
澗飲巖棲夢餘想翰林溼薪爆竹聲待詔履穿沾雲行

蘭臺從事更閒冷文書如山白髮生孤燈靜照寒窗宿
北風夜半歌黃鵠田家閉門風雪深梅花開時酒應熟
半世虛名不療貧樓遲零落百酸辛憑君莫向山中說
白石清泉笑殺人

鄧州城樓

鄧州城下湍

音專

水流鄧州城隅多古丘隆中布衣不復

見浮雲西山空悠悠長鯨駕空海波立老鶴叫月蒼煙

愁自古江山感遊子今人誰解賦登樓

宛丘歎

秦陽陂頭人迹絕
荻花茫茫白於

一作如

雪當年萬家河

朔來盡出牛頭入租帖
蒼髯長官錯料事下考大笑陽

城拙至今三老背腫青死為逋
懸出膏血君不見劉君

宰葉海內稱饑摩寒拊哀孤惻
碑前千人萬人泣父老

夢見如平生冰霜紉袴渠有策
如我碌碌當何成荒田

滿眼人得耕詔書已復三年征
早晚林間見雞犬一犁

春雨麥青青

髯李令南陽配流民以牛頭租迫而逃者
萬餘家劉雲卿御史宰葉除逃戶稅三萬

斛百姓為之立碑頌德賢不肖用心相遠如此李之後
十年予為此縣大為逋懸所困辛卯七月農司檄予按
秦陽陂田感而賦詩李與劉
皆家宛丘故以宛丘歎命篇

遊黃華山

黃華水簾天下絕我初聞之雪溪翁丹霞壁高歡宮
銀河下濯青芙蓉昨朝一遊亦偶爾更一作覺摹寫難

為功是時氣節已三月山木亦立無春容湍聲洶洶轉
絕壑雪氣凜凜隨陰風懸流千丈忽當眼芥蒂一洗平
生胸雷公怒擊散飛雹日脚倒射垂長虹驪珠百斛供

一瀉海藏翻倒愁龍公輕明圓轉不相礙變見融結誰
為雄歸來心魄為動蕩曉夢月落春山空手中仙人九
節杖每恨勝景不得窮攜壺重來巖下宿道人已約山
櫻紅

密公寶章小集

天東長白大寶幢天河發源導三江有木蔽映山朝陽
云誰巢者雛鳳凰雲間吐氣日五色百鳥不敢言文章
名都盤盤魏大梁黃金甲第羅康莊王家書絕畫亦絕

欲與中祕論低昂密公書院無絲簧窻明几潔凝幽香
元光以後門鑰廢文士稍得連壺觴客來喜色浮清揚
典衣置酒餘空箱生平俊氣不易降眼中俗物都茫茫
淵明素琴嵇阮酒妙意所寄誰能量在昔武元握乾綱
扶桑為弓射八荒獵取一作兩大國如驅羊民風朴魯資
驚彊文洽未及武尅剛興陵之孫越王子天以人瑞歸
明昌十三執經侍帝傍十八健筆凌阿房撐腸文字五
千卷靈臺架構森鋪張高陽苗裔襲衆芳胡不置之貢

玉堂袖中正有活國手地下纔得修文郎悲風蕭蕭吹
白楊丘山零落可憐傷承平故態耿猶在拂拭寶墨生
輝光恰似如菴連榻坐一甌春露澹相忘

明昌寶玩羣
玉中祕內府

圖書印也越邸有柳公權紫絲鞵歐率更海上楊凝式
乞花等帖然獨推元章華佗為古今絕筆宋畫譜山水
以李成為第一國朝張太師浩然王內翰子端奉旨品
第書畫謂成筆意繁碎有畫史氣象次之荆關范許之
下密公識賞超詣亦以此論為公郭乾暉崔棘公以為
當在太古無上唐以來諸人筆虛筆實皆非其比故予
詩及之樗軒公自號也又所居有如菴詩集號如菴小
菴越王諸子惟樗軒貧甚典衣沽酒之句蓋寶錄云甲
午三月二十有一日為輔之
書于脚城至覺寺之寓居

荊棘中杏花

牆東荒蹊抱邨斜，荊棘狼籍盤根芽。
何年丹杏此留種，小紅濺濺爭春華。
野人慣見漫不省，獨有詩客來咨嗟。
天真不到鉛粉筆，富豔自是宮闌花。
曲池芳徑非宿昔，蒼苔濁酒同天涯。
京師惜花如惜玉，曉擔賣徹東西家。
杏花看紅不看白，十日忙殺遊春車。
誰家園亭有此樹，鄭重已著重幃遮。
阿嬌新寵貯金屋，明妃遠嫁愁清笳。
落花紫簾拂牀席，亦有飄泊沾泥沙。
天公無心物自物，

得意未用相陵誇黃昏人歸花不語惟有落月唬栖鴉
送張君美往南中

南朝詞臣北朝客棲遲零落無顏色陽平城邊握君手
不似銅駝洛陽陌去年春風吹鴈迴今年鴈逐秋風來
春風秋風鴈聲裏行人日莫心悠哉長江大浪金山下
吳兒舟船疾於馬西湖十月賞風煙想得新詩更瀟灑
贈休糧張鍊師

金砂霧散風雨疾一點黃金鑄秋橘中林宴坐人不知

野鹿銜花蜂課蜜富兒盤饌羅羶葷擾擾飛蠅復聚蚊
見說西山好薇蕨一枝青竹願隨君

讀書山雪中

前年望歸歸不得去年中途脚無力殘生何意有今年
突兀家山墮眼前東家西家百壺酒主人捧觴客長壽
先生醉袖挽春迴萬落千邨滿花柳山靈為渠也放顛
世界幻入兜羅綿似嫌衣錦太寒乞別作玉屑妝山川
人言少微照鄉井準備黃雲三萬頃何人辦作陳瑩中

來與先生共炊餅

陳先生貶官後荅京師人書云南州有何事今年好雪明年炊餅大耳

過晉陽故城書事

惠遠祠前晉溪水翠葉銀花清見底水上西山如卧屏
鬱鬱蒼蒼三百里中原北門形勢雄想見城闕雲煙中
望川亭上閱今古但有麥浪搖春風君不見繫舟山頭
龍角禿白堦一摧城覆沒薛王出降民不降屋瓦亂飛
如箭鏃汾流決入大夏門府治移著唐明邨只從巨屏
失光彩河洛幾度風煙昏東闕蒼龍西玉虎金雀觚稜

上雲雨不論民居與官府仙佛所廬餘百所鬼役天財
千萬古爭教一炬成焦土至今父老哭向天死恨河南
往來苦南人鬼巫好襪祥萬夫畚鍤開連岡官街十字
改丁字釘釘去聲破并州渠亦亡幾時却到承平了重看官

家築晉陽

蟾池

老蟾食月飽復吐天公一目頻年瞽下界新增養蟾戶
玉斧誰憐修月苦郡國蟾池知幾所碧玉清流水仙府

小蟾徐行腹如鼓大蟾張頤怒於虎渠家睂間有黃乳
膏梁大丁正須汝何人敢與月復讎疾過池頭不容語
向來屬私今屬官從今見蟄當好看爬沙即上青雲端

高門關

高門關頭霜樹老細路千山萬山繞亂餘邨落不見人
雪霰霏霏暗清曉莘川百里如掌平閒田滿眼人得耕
山中樹藝亦不惡誰遣多田知姓名許李申楊竟何得
只今惟有石灘聲

許致忠楊湯臣申伯勝李仲常名宦
四家隱盧氏時以多田推之亂後俱

不知所
在矣

元詩選初集卷一

欽定四庫全書

元詩選初集卷二

庶吉士顧嗣立編

甲辰秋洛陽得黃葵子種之南菴明年夏六月作
花佛經所謂閻浮檀金明淨柔軟令人愛樂者此
花可以當之因為賦長韻予方以病止酒故卒章
及之

芳蕤浥露嬌黃溼五疊湘裙輕襞積晨妝午醉一日間
白白紅紅總狼籍上陽宮女要頭冠摹寫雖工破的難

看來明淨復柔軟花中乃有閭浮檀千里移根洛陽陌
主人不飲誰看客乞與金杯自傾側明年為渠當舉白

雲峽

并序

君璋啓事西涼占對稱旨其還也行臺公以宣
和寶石為貺奇秀溫潤信天壤間之尤物君璋
目之曰雲峽邀詞客賦詩予亦同作

石盆清冷貯秋水水面蒼煙飛不起一堆寒碧几研間
寶氣崢嶸插箕尾山中雪浪空影像長安鸚鵡猶紈綺

枉著奇章甲乙中
槁項纔堪把耒耨
不知天壤此尤物
鬼刻神剜通有幾
薰蒸似欲出泉脈
瑩滑定應凝石髓
剝裂雲華漬月秋
辛苦詩仙費摹擬
車箱箭筈連西東
仇池百穴總玲瓏
飛墮不嫌靈鷲小
奇探已覺太湖空
故都喬木今如此
夢想熙春百花裏
膏血網船枯九州
亡國愁顏為誰洗
主人天質粹以溫
天然與山作知聞
退食從容北窻卧
今古起滅真浮雲

雲巖

并序

觀州倅武伯英崞縣人少日舉進士有詩名其
賦翦燭刀有嘯殘瘦玉蘭心吐蹴落春紅燕尾
香之句甚為時輩所稱家故饒財第宅園亭為
河東之冠貯書有萬卷樓嘉花珍果悉自他州
移植為人多伎巧山水雜畫斲琴和墨皆極其
工嘗得宣和湖石一竅竅穿漏殆若神剗鬼鑿
炷香其下則煙氣四起散布槃水上濃淡霏拂
有煙江疊嶂之韻吾鄉衣冠家法書名畫及藏

書之多亦有伯英相上下者伯英獨恃寶石以
擅奇汾晉間耳興定末伯英沒於關中楊戶部
叔玉購石得之壬辰圍城中以示予且命作詩
危急存亡之際不暇及也乙巳冬十一月來東
平過聖與張君之新軒而此石在焉聖與名之
曰雲巖予問石所從來聖與言夏津王帥得之
汴梁泥塗中而以見貽予因歎一物之微經歷
世變遷徙南北乃復為好事者之所寶玩似不

偶然乃為詩道其故聖與三世相家以文章名
海內其才情風調不減前世賀東山晏叔原故
卒章以蕭閒明秀峰故事屬之

壺中九華玉孌顏紫煙著水往復還小窻虛明淡相對
不數漢宮銅博山會稽禹穴深無底寶石偷來定山鬼
一堆寒碧殊不凡滿谷春雲更堪喜阿欣秀發見睂宇
小杜才情淪骨髓摩挲不作几上看繚白紵青便千里
渾沌日鑿餘空嵌漏天蒸溼饒風嵐世外元無種香國

海南真有補陀巖觀州愛玩頻被民部平生幾熏沐
藏舟夜壑未厭深竟作新軒坐中物一天星斗入金尊
翠射娉婷自有人只欠宣和鄭先覺為君留寫五湖真

天涯山

九州上游推大鹵獨恨山形太椎魯天涯一峰今日看
快似昂頭出環堵何年氣母此融結鬼鑿神剗未奇古
八憲玲瓏透朝日洞穴慘澹藏雷雨名花錦石粲可喜
乞與雲煙相媚媼半空擲下金芙蕖想得飛來自玄圃

傳聞絕頂更靈異云是清都羣玉府五雲飛步吾未能
風袂泠泠已輕舉東州死愛華不注向在陋邦何足數
敬亭不著謝宣城斷岸何緣比天姥酒船何時朝復莫
倒卷滄沱浣塵土喚起山靈槌石鼓漢女湘妃出歌舞
詩狂他日笑遺山飲顙不妨嘲杜甫

山有石
鼓神祠

王右丞雪霽捕魚圖

江雲澠澠陰晴半沙雪離離點江岸畫中不信有天機
細向樹林枯處看漁浦移家媿未能扁舟蕭散亦何曾

白頭歲月黃塵底笑殺高人王右丞

世宗御書田不伐望月婆羅門引先得楚字韻

瑤光樓前按歌舞桂樹秋香月三五白頭誰解記開元
四海歡聲自簫鼓兩都秋色皆喬木三月阿房已焦土
天人亦有離別情可是田郎心獨苦承平舊物霓裳譜
寶氣暉暉映千古銀橋望極竟不歸滅沒燕鴻下平楚

贈別孫德謙

津橋垂楊雪花白挽斷春衫苦留客西河一雨春意濃

絕似銅駝洛陽陌河亭轟醉卧春風到手金杯不放空
鵲山一帶傷心碧羨殺孫郎馬首東

太原贈張彥遠

并州城邊十月末清霜稜稜風入骨因君夜話吳江春
酒光潋灩金杯滑間間騎鯨去滅沒當年愛君俊於鵲
平生我亦識翁人惆悵流年如電抹官家新築文昌臺
蒼生不憂墮巔崖眼看東閣奇士滿如君豈得藏蒿萊
晨雞未鳴子當發明星煌煌大於月野夫一笑冠纓絕

鹿泉新居二十四韻

土門西邊井陘渡野日荒荒下汀樹榆關石嶺都幾程
客夢往往迷歸路塵埃風雨半生過儘著筋骸支世故
寧州假館又兩年未保東來不西去山城百家家有山
觀面呈山誰一顧賣書買得呂氏園不謂全山舉相付
北崖老作土灰色擁腫形模一夸父娟娟正有小峨嵋
却立不容親杖屨就中抱犢尤峭拔望見韓山即攀附
韓王砦頭四望闊全趙米如纔數聚眼中麾蓋天上來

泚水鼓旗紛偃仆漢家威靈萬萬古石子連岡猶虎距
夏秋衆壑會鹿泉浩浩湍聲瀉餘怒西南諸峰不知數
蕩海鯢鱷尻背露霏煙空翠有無中百態陰晴變朝莫
靈巖龍泉曾一到獨欠封龍展衰步學仙不愛徐童花
李相書龕心所慕平生懷抱向山盡老氣崔嵬如有助
巖居枯寂朝市喧喧寂兩間差有趣得行固願留不惡
流坎且當隨所遇何曾萬錢何用許方丈有山容下筓
管城初無食肉相黃帽非供折腰具明年高築野史亭

天已安排看山處多

一作尚

慙不及謝宣城標出敬亭天

一柱

一本二句在方丈
有山容下筋之下

王學士熊岳圖

洗參池水甜於蜜玉堂仙翁髮如漆膝前丈度更風流
盡卷風流入詩筆長松手種欲摩天海岳樓空落照邊
古來說有遼東鶴仙語星星誰為傳五百年間異人出
却將錦繡裹山川

去歲君遠遊送仲梁出山

去歲君遠遊今年客他州青天萬古一明月只與行人

生莫愁問君遊何許情多地僻

一作遐

今徧處處金鞭斷

折騏驎死萬里長鴻思一舉憶初識子梁王臺清風入

座無纖埃華岳峰尖見秋隼金眸玉爪不凡材西園日

晴花滿煙五雲樓閣三山巔玉樹瑤林照春色青錢白

璧買芳年三年一夢南陽道汴水迢迢入秋草挈雲心

事人不知千首新詩怨枯槁破屋仰見星疎衾風露清

匣中有長劒為君鳴不平泥塗久辱思一濯去去舉足

皆清冷鄧州大帥材望雄愛客不減奇章公軍中宴酣
笳鼓競銀燭吐焰如長虹幕中多士君又往談笑已覺
南夸空東州春迴十月後梅花分香入春酒平生得意
欽與京青眼高歌望君久浙江南下青汙汙石門細路
蒼煙屯五松平頭白日靜千山萬山如亂雲菊源不逐
時事改芝嶺自與商顏鄰他日相思一回首漁舟時問

武陵人

欽謂欽叔京即京父也
樂天書以微之為微

此日不足惜

此日不足惜此酒不可無頗怪昌黎公亦復為世儒天生至神物與人作華胥一酌舌本強二酌燥吻濡三酌動高興四酌色數腴連繇五六酌枯腸潤如酥眼花耳熱後萬物寄一壺十酌未渠央百觚亦奚拘人生一世間忽若過隙駒有酒不解飲問君誰與娛君不見東家騎驄李膽滿六尺軀萬言黃石策八陣夔州圖酒酣起舞不稱意長吁青雲指夷吾又不見西家紫髯郎老氣雄萬夫狂歌飲燕市擊筑聲嗚嗚倚天長劒插少室頗

欲四海皆東湖鷹揚虎視今焉如河山永隔黃公壚銜
杯直待秋井塌青苔白骨憐君愚少年覓計生白須捫
參歷井無危途榮不滿睨良區區就令一朝便得八州
督爭似高吟大醉窮朝晡餘名安得潤枯骨四十豈不
知頭顱此日不足惜此酒不可無太虛為室月為燭醉
倒不用春風扶

虎害

北山虎有穴南山虎為羣目光如電聲如雷倚蕩起伏

山之垠百人一飽不留骨敗衣墜絮徒紛紛空谷絕樵
聲長路無行塵呀呀垂涎口眈眈闕城闔天地豈不仁
社公豈不神哀哀太山婦叫斷秋空雲可憐封使君生
不治民死食民世上無復裴將軍北平太守今何人

寄趙宜之

趙時在
廣氏

大城滿豺虎小城空雀鼠可憐河朔州人掘草根官煮
弩北人南來向何處共說華川今樂土華川三月春事
忙布穀勸耕鳩喚雨舊聞抱犢山摩雲出蒼稜長林絕

壑人迹所不到可以避世如武陵煮橡當果穀煎米甘
飴餬此物足以度荒歲况有麋鹿可射魚可罾自我來
嵩前旱乾歲相仍耕田食不足又復違親朋三年西去
心籠禽念飛騰一瓶一鉢百無累恨我不如雲水僧崧
山幾來層不畏登不得但畏不得登洛陽一昔秋風起
羨殺雲間

一作吳中

張季鷹

紀子正杏園燕集

甲午歲

紀翁種杏城西垠千株萬株紅豔新今年寒食好天色

曉氣鬱鬱含芳津天公自愛此花好朝薰莫染煩花神
融霞暈雪一傾倒非煙非霧非卿雲未開何所似乳兒
粉妝深絳脣能唬能笑癡復騃畫出百子元非真半開
何所似里中處女東家鄰陽和入骨春思動欲語不語
時輕輦就中爛漫尤更好五家合隊號與秦曲江江頭
看車馬十里羅綺爭紅塵陽平一邑多詩豪主人買酒
邀衆賓花時有成約恨少楊子張吾軍落花著衣紅續
紛四坐慘澹傷精魂花開花落十日耳對花不飲花應

嗔愛花常苦得花晚爭教行樂無閒身芳苞一破不更
合且看錦樹烘殘春

王黃華墨竹

為郭輔之賦

古來畫竹尊右丞東坡斂袂不敢評開元石本出摹寫
燕市駿骨留空名亦有文湖州畫意不畫形一為坡所
賞四海知有簞籬亭深衣幅巾老明經老死不敢言縱
橫豈知遼江一派最後出運斤成風刃發硎雪溪仙人
詩骨清畫筆尚餘詩典刑月中看竹寫秋影清鏡平明

白髮生娟娟畧似萱草詠落落不減叢臺行千枝萬葉
何許來但見醉帖字敍傾君不見忠恕大篆草書法趙
生怒虎嘖墨成至人技進不名技遊戲亦復通真靈百
年文章公主盟屏山見之蹠且擎聲光舊塞天壤破議
論今著兒曹輕有物於此鳴不平悲邪嘯邪誰汝令只
恐破窻風雨夜怒隨雷電上青冥

泛舟大明湖

待杜子不至

長白山前繡江水展放荷花三十里看山水底山更佳

一堆蒼煙收不起山從陽立西來青一彎天公擲下半
玉環大明湖上一杯酒昨日繡江簪睨間晚涼一櫂東
城渡水暗荷深若無路江妃不惜水芝香狼籍秋風與
秋露蘭襟鬱鬱散芳澤羅襪盈盈見微步晚晴一賦畫
不成枉著風標誇白鷺我時驂鸞追散仙但見金支翠
蕤相後先眼花耳熱不稱意高唱吳歌叩兩舷喚取樊
川揉醉筆風流聊與付他年

九月七日夢中作詩續以末後二句

桃花紅深李花白昨日成團今日折歌聲滿耳何處來
楊柳青旗洛陽陌拊君背握君手朝鐘莫鼓無了期世
事於人竟何有青青鏡中髮忽忽成白首六國印何如
負郭二頃田千載名不及即時一杯酒

湧金亭示同遊諸君

太行元氣老不死上與左界分山河有如巨鼉昂頭西
入海突兀已過餘坡陀我從汾晉來山之面目腹背皆
經過濟源盤谷非不佳煙景獨覺蘇門多湧金亭下百

泉水海眼萬古留山阿盛沸灤水源瀟淪晉溪波雲雷
涵鬼物窟宅深蛟鼉水妃簸弄明月璣地歲發泄天不
訶平湖油油碧於酒雲錦十里翻風荷我來適與風雨
會世界三日漫兜羅山行不得山北望空長哦今朝一
埽衆峰出千鬟萬髻高峨峨空青斷石壁微茫散煙蘿
山陽十月未搖落翠蕤雲旆相盪摩雲煙故為出濃淡
魚鳥似欲留婆婆石間仙人迹石爛迹不磨仙人去不
返六龍忽蹉跎江山如此不一醉拊掌笑殺孫公和長

安城頭烏尾訛并州少年夜枕戈舉杯為問謝安石蒼
生今亦如卿何元子樂矣君其歌

南冠行

癸巳秋為
曹得一作

南冠纍纍渡河關畢逋頭白乃得還荒城雨多秋氣重
頽垣敗屋深茅管漫漫長夜浩歌起清涕曉枕留餘潛
曹侯少年出紈綺高門大屋垂楊裏諸房三十侍中郎
獨守殘編北窻底王孫上客生光輝竹花不實鷓鴣饑
絲桐切切解人語海雲喚得青鸞飛梁園三月花如霧

臨錦芳華朝復莫阿京風調阿欽才暈碧裁紅須小杜
長安張敞號睂嫵吳中周郎知曲悞香生春動一詩成
瑞露靈芝滿窻戶魚龍吹浪三山沒萬里西風入華髮
無人重典鵲鸛表展轉空牀卧秋月寶鏡埋寒灰鬱鬱
萬古不可開龍劍出地底青天白日驅雲雷層冰千里
不可留離魂楚些招歸來生不願朝入省莫入臺願與
竹林嵇阮同舉杯郎食猩猩脣妾食鯉魚尾不如孟光
案頭一盃水黃河之水天上流何物可煮人間愁撐霆

裂月不稱意更與倒翻鸚鵡洲安得酒船三萬斛與君
轟醉太湖秋

題劉紫微堯民野醉圖

蒼苔濁酒同歌呼白鬚紅頰醉相扶堯時皇質未全散
不論朝野皆歡虞望雲雲非雲就日日非日先秦迂儒
強解事極口譽堯初未識堯民與酒同一天此外更誰
為帝力仙老曾經甲子年戲將陳迹畫中傳山川淳朴
忽當眼迴望康衢一慨然

一本無此二句

不見只今汾水上田

翁鞭背出租錢

堯甲子年仙
人張果事

下黃榆嶺

北崖玄武莫黔黑如積鐵東崖劫火餘絢爛開錦纈就
中嶺頭一峰凸樸奇剝費寒雲幾千疊摩圍可望不可
到青壁無梯猿叫絕林煙日射彩翠新跬步疑有黃金
闕畫工胸次墨汁滿那得冰壺貯秋月直須潮陽老筆
迴萬牛露頂張顛揮醉帖石門細路無暗泉行人饑渴
挽不前辛苦黃榆三十里豈知却有看山緣

驅豬行

黃臺張氏莊作

卷二

沿山蒔苗多費力辦與豪豬作糧食草菴架空尋丈高
擊版搖鈴鬧終夕孤犬無猛噬長箭不暗射田夫睡中
時叫號不似驅豬似稱屈放教田鼠大於兔任使飛蝗
半天黑害田爭合到渠邊可是山中無橡朮長牙短喙
食不休過處一抹無禾頭天明隴畝見狼籍婦子相看
空淚流旱乾水溢年年日會計收成纔什一資身百倍
粟豆中儋石都能幾錢直兒童食糜須愛惜此物羣豬

口中得縣吏即來銷稅籍

遊龍山

曩予魏大梁得交此州雷與劉自聞兩公誇南山每恨
南海北海風馬牛老龍面目今日始一見更信造物工
雕鏤是時山雨晴平田綠油油並山涼氣多況得通深
幽山泉谷口出迎客石罅戛擊琳琅球蜿蜒入微行漸
覺藤蘿冒衣樹打頭惡木拉颰棲直幹比指稠石門無
風白日靜自是林響寒颼颼一峰忽當眼仰看看不休

一峰一峰千百峰雖欲一一顧揖知無繇金城偃蹇不
得上瑤壑回合如相留苔花萬錦石丹碧爛不收天闕
守虎豹武庫開戈矛小山隨起隨偃仆獨立千仞絕頂
縹緲之飛樓百花岡頭藉草坐瀟灑正直金蓮秋亭亭
妙高臺玉斧何年修登高覽元化快如鷹脫鞵山靈故
為作開闔巧與詩境供冥搜白雲何許來纖絲弄輕柔
蓬萊作霧湧飄飄與煙浮玉衣仙人鞭素蚪翕忽變化
令人愁須臾視六合浩蕩不可求初疑陶輪比運甕今

悟夜壑真藏舟劫石拂未窮杞國浪自憂斷鼃立極萬
萬古爭遣起滅如浮漚快哉萬里風一掃天四周誰言
太始再開闢日馭本自無停輶舉手謝山靈就無清涼
毫相非神羞賤子貪名山客刺已屢投黃華挂鏡臺天
壇避秦溝太山神明觀二室汗漫遊胸中隱然復有此
大物便可揮斤八極隘九州玉峰有佳招絕唱須一酬
為君探囊擲下珊瑚鉤白雲相望空悠悠異時華表見
老鶴姓字莫忘元丹丘

遊泰山

泰山天壤間屹如鬱蕭臺厥初造化手辦此何雄哉天
門一何高天險若可階積蘇與累塊分明見九垓扶搖
九萬里未可誣齊諧秦皇憺威靈茂陵亦雄材翠華行
不歸石壇滿蒼苔古今一俯仰感極令人哀是時春夏
交紅綠無邊涯奇探忘去聲登頓意愜自遲回惜無賞心
人歡然盡餘杯夜宿玉女祠崩奔湧雲雷山靈見光怪
似喜詩人來雞鳴登日觀四望無氛霾六龍出扶桑翻

動青霞堆平生華嵩遊茲山未忘懷十年望齊魯登臨
負吟鞵孤雲拂層崖青壁落落雲間開眼前有句道不
得但覺胸次高崔嵬徂徠山頭喚李白吾欲從此觀蓬
萊

遊承天懸泉

詩人愛山愛徹骨十月東來犯冰雪懸流百里行不前
但覺飛湍醒毛髮間間老仙仙去久石壁姓名苔蘚滑
此翁可是六一翁四十三年如電抹并州之山水所汎

駭浪幾轟山石裂只知晉陽城西天下稀娘子關頭更
奇劒周南留滯何敢歎投老天教探禹穴君不見管涔
汾源大車輪平泉大八玻璃盆不知承天此水何所本
乃與沅瀆爭雄尊平地突出隨崩犇洶如頽波射天門
太初元氣未凝結更欲何處留胚腴素蚪騰擲翠蛟舞
淅淅後出皆鱣鯢雷車怒擊冰雹散石峽峻滑蒼煙屯
憑崖下視心魄動自媿氣衰筆老勝槩過眼無繇吞少
東水簾亦瀟灑珠琲一一明朝暎陽龍暗滋瑤草活畧

石自與蓮湯溫神祠水之許儀衛盛官府頗怪祠前碑
稽考失莽魯吾聞尹革臺駘宣汾洮障大澤自是生有
自來歸有所假而自經溝瀆便可尸祝之祀典紛紛果
何取子胥鼓浪怒未洩精衛銜薪心獨苦楚臣有問天
不酬肯以誕幻虛荒驚聾瞽宇宙有此水萬古萬萬古
人言主者介山氏且道未有介山之前復誰主山深地
古自是有神物不假靈真誰敢侮稗官小說出閭巷社
鼓邨簫走翁媪當時大厯十才子爭遣李諵鑱陋語石

林六月清無暑人家青紅溼窻戶射鹿有場魚有浦好
築漕臺俯洲渚甕面柳瓢挹膏乳醉扶紅袖別吳歌風
雨不憂驚妒女間間公守平定以大安庚午來遊迄今
壬子四十三年矣土俗傳介子推被焚
其妹介山氏恥兄要君積薪自焚號曰妒女祠碑大厯
中制官李諲所撰辭旨殊謬至有百日積薪一日燒之
之語鄉社至今以百五日積
薪而焚之謂之祭妒女云

天門引

秦王宮中

一作
深居

不得近從破衡成欲誰信白頭遊客困

咸陽顙頰黃金百斤盡海中仙人黃鶴

一作
鵠

舉大笑人

閒爭腐鼠大夫何意作蘇秦六印才堪警兒女古來多
為虛名老不見阿房淨如埽千年虎豹守天門一日牛
羊卧秋草

蛟龍引

古劍咸陽墓中得扶開青雲見白日蛟龍地底氣如虹
土花千年不敢蝕洪鑪烈焰初騰精橫海已覺無長鯨
世上元無倚天手匣中誰解不平鳴割城恨不逢相如
行酒恨不逢朱虛尚方未入朱雲請盟盤合與毛生俱

誰念田文坐中客只將彈鋏歎無魚

湘夫人詠

木蘭芙蓉滿芳洲白雲飛來北渚游千秋萬歲帝鄉遠
雲來雲去空悠悠秋風秋月沅江渡波上寒煙引輕素
九疑山高猿夜號竹枝無聲墮殘露

孤劍詠

鬱鬱重鬱鬱夜半長太息吟成孤劍詠門外山鬼泣清
霜稜稜風入骨殘月耿耿燈映壁君不見一饑縛壯士

僵卧時自惜黃鵠一舉摩蒼天時念樊籠束修翼

渚蓮怨

阿溪何許來素面浣風雨寂莫煙中魂依依欲誰語

芳華怨

娃兒十八嬌可憐亭亭裊裊春風前天上仙人玉為骨
人間畫工畫不出小小油壁車軋軋出東華金縷盤雙
帶雲裾踏鴈沙一片朝雲不成雨被風吹去落誰家少
年豈無恩澤侯金鞍繡帽亦風流不然典取鸕鶿裘四

壁相如堪白頭金谷樓臺悄無主燕子不來花著雨只
知環珮作離聲誰向琵琶得私語無情鷓鴣翡翠兒有
情蜂雄蛺蝶雌勸君滿酌金屈卮明日無花空折枝

後芳華怨

江南破鏡飛上天三五二八清光圓豈知汴梁破來一
千日寂莫菱花仍半邊白沙漫漫車轆轤鷄絃中杜
鵑哭塞門顚顚人不知枉為珠娘怨金谷樂府初唱娃
兒行彈棋局平心不平只今雄蜂雌蝶兩不死老眼天

公如有情白玉搔頭綠雲髮玫瑰面脂透肉滑春風著
人無氣力不必相思解銷骨落花絕品姚家黃揚州銀
紅一國香千圍萬繞看不足雨打風吹空斷腸丹砂萬
年藥金印九一作八州督不及秦宮一生花裏活長門曉
夕壽相如儘著千金買消渴

結楊柳怨

長樂坡前一

一作百

杯酒鄭重行人結楊柳可憐楊柳千

萬枝

一作條

看看盡入行人手輕煙細雨綠相和惱亂春

風態度多路人愛是

一作此

風流樹無柰朝攀莫折何朝

攀莫折何時了不道行人暗中老素衣今日洛陽塵白

髮明朝塞城草柳色年年歲歲青關人何事管離情春

風誰向丁寧道折斷

一作盡

長

一作柔一作垂

條莫再生

秋風怨

碧瓦高梧響疎雨坐倚薰籠時獨語守宮一著死生休
狗走雞飛莫為女雲間簫鼓夜厭厭禁漏誰將海水添
迎春門外羊車過又見秋風拂翠簾總把丹青怨延壽

不知猶有竹枝鹽

歸舟怨

渡頭楊柳青復青
閨中少婦動離情
只從問得狂夫處
夜夜夢到洛陽城
南風吹櫓聲北鴈鳴
嚶嚶江流望不極
相思春草生

征人怨

瀚海風煙埽易空
玉關歸路幾時東
塞垣可是秋寒早

一夜清霜入

一作滿鏡中

塞上曲

平沙細草散羊牛幾

一作簇

征人在戍樓忽見隴頭新

鴈過一時回首望南州

西樓曲

游絲落絮春漫漫西樓曉晴花作團樓中少婦弄瑤瑟

一曲未終坐長歎去年與郎西入關春風浩蕩隨金鞍

今年疋馬妾東還零落芙蓉秋水寒并刀不翦東流水

湘竹年年淚

一作露

痕紫海枯石爛兩鴛鴦只合雙飛便

雙死重城車馬紅塵起乾鵲無端為誰喜鏡中獨語人
不知欲插花枝淚如洗

後平湖曲

越女顏如花吳兒潔於玉天教竝牆居不著同被宿美
人一笑千黃金連城不博百年心樓上牆頭無一物莫
釵朝春一生足秋風拂羅裳秋水照紅妝舉頭見郎至
低頭采蓮房郎心只如菱刺短妾意未覺藕絲長與郎
期何許眼礙同舟女春波澹澹無盡情雙星盈盈不得

語十里平湖艇子遲岸花汀草伴人歸鴛鴦驚起東西
去惟有蜻蜒接翅飛

長安少年行

黃衫少年如玉筆生長侯門人不識道逢豪客問姓名
袖把金鞭側身揖卧馳行橐錦帕蒙石榴壓漿銀作筒
八月蒼鷹一片雪五花驕馬四蹄風日暮新豐原上獵
三更歌舞灞橋東

黃金行

贈王飛伯

王郎少年詩境新氣象慘澹含古春
筆頭仙語復鬼語只有溫李無他人
天公著詩貧子身子曾不知乃自神
人間不買詩名用一片青衫衡霍重
兒貧女富母兩心何論同袍不同夢
入門喚婦不下機淚子垢面兒啼饑
君詩只有貧女謠何曾夢見金縷衣
外家翁媼日有語嫁女書生徒爾為
昆陽城下三更酒醉膽輪囷插星斗
一夕一作昔詩腸老蛟吼十尺長人墮車走
斫頭不屈三萬言欲向何門復低首
何人壽我黃金千使君破鏡飛

上天

隋故宮行

渭川楊柳先得春二月鶯啼百轉新
長春宮中千樹錦
暖日晴雲思殺人君王半醉唱吳歌
絳仙起舞舞嚙翠蛾
吳兒漫說曾行樂三十六宮能幾多
千秋萬古金銀闕
海沒三山一毫髮繁華夢覺人不知
留得寒蟬泣秋月
解劍行

古劍黑於漆鬱鬱動星文
摩挲二十年今日持贈君
長

鯨鼓浪三山，沒知君不是泥中物。袖間一卷白猿書，未
分持刀買黃犢。壯懷風雲鬱沈沈，慙媿漂母無千金。長
安侏儒飽欲死，萬古不解天公心。北風浩浩吹行客，隴
水無聲雪花白。荆卿墓頭秋草乾，擊筑行歌欲誰識。君
不見秦相五殺皮，去時烹雞吹戾戾。又不見敝裘蘇季
子，合從歸來印累累。丈夫墮地自有萬里氣，翕忽變化
安能知大冠如箕。望吾子富貴，同生亦同死。

征西壯士謠

三十未有二十強
手內蛇矛丈八長
總為官家金印大
不怕百死向沙場
捉却賀蘭山下賊
金鞍繡帽好還鄉

望雲謠

涉江采芙蓉
芙蓉待秋風
登山采蘭苔
蘭苔霜早彫
美人亭亭在雲霄
鬱搖行歌不可招
湘絃沈沈寫幽怨
愁心歷歷亂如曳
繭金支翠蕤
紛在眼
春草迢迢春波遠

望歸吟

塞雲一抹平如截
塞草離離卧榆葉
長城窟深戰骨寒

萬古牛羊飲冤血少年錦帶佩吳鉤獨騎疋馬覓封侯
去時只道從軍樂不道關山空白頭北風吹沙雜飛雪
弓弦有聲凍欲折寒衣昨夜洛陽來腸斷空閨擣秋月
年年歲歲望還家此日歸期轉未涯誰與南州問消息
幾時重拜李輕車

梁園春五首

車駕還汴
京後作

軍從南去三回勝雪自冬來二尺強今歲長春多樂事

內家應舉萬年觴

長春德陵
誕節名

金方巨屋全言
集二
暖入金溝細浪添
津橋楊柳綠纖纖
賣花聲動天街遠
幾處春風揭繡簾

上苑春濃畫景閒
綠雲紅雪擁三山
宮牆不隔東風斷
偷送天香到世間

樓觀沈沈細雨中
出牆花木亂青紅
朱門不解藏春色
燕宿鶯啼處處通

雙鳳簫聲隔綵霞
宮鶯催賞玉谿花
誰憐麗澤門邊柳
瘦倚東風望翠華

龍德宮有玉谿館
麗澤燕都西門名

採花詞三首

禁裏蒼龍啟九闕殿前鸚鵡喚新班
沈沈綠樹鞭聲遠
嫋嫋薰風扇影閒

浩蕩春風入繡鞍可憐東野一生寒
皇州花好無人管
不用新郎走馬看

六十人中數少年風流誰占採花筵
阿欽正使才情盡

猶欠張郎白玉鞭

李欽用二十七張夢祥少一歲又未婚云

獵城南

翩翩游俠兒白馬如足練朝出城南獵莫趁軍中宴北
平有真虎愛惜腰間箭

春風來

春風來時瑤草芳綠池珠樹宿鴛鴦春風去後瑤草歇
來鴻去鴈遥相望鴛鴦不得雙燕鴻天一方娟娟愁看
色靜與遥山長錦衾復羅薦夢語相思怨月明烏夜啼
空閨淚如霰

并州少年行

北風動地起天際浮雲多登高一長嘯六龍忽蹉跎我
欲橫江鬪蛟鼉萬弩迸射陽侯波或當大獵燕趙間黃
熊朱豹皆遮羅男兒萬馬隨撓訶朝發細柳莫朝那埽
雲黑山布陽和歸來明堂見天子黃金橫帶冠戢戢人
生只作張騫傳介子遠勝僵死空山阿君不見并州少
年夜枕戈破屋耿耿天垂河欲眠不眠淚滂沱著鞭忽
記劉越石拔劒起舞雞鳴歌東方未明兮崇夜何

續小娘歌十首

李太白集卷二
吳兒沿路唱歌行十五五和歌聲唱得小娘相見曲
不解離鄉去國情

北來游騎日紛紛斷岸長隄是陣雲萬落千邨藉不得
城池留著護官軍

山無洞穴水無船單騎驅人動數千直使今年留得在
更教何處避明年

青山高處望南州漫漫江水遶城流願得一身隨水去
直到海底不迴頭

風沙昨日又今朝踏碎鷓鴣頭路更遙不似南橋騎馬日
生紅七尺繫郎腰

鴈鴈相送過河來人歌人哭鴈聲哀鴈到秋來却南去
南人北渡幾時回

竹溪梅鴈靜無塵二月江南煙雨春傷心此日河平路
千里荆榛不見人

太平婚嫁不離鄉楚楚兒郎小小娘三百年來涵養出
却將沙漠換牛羊

饑鳥坐守草間人青布猶存舊領中六月南風一萬里
若為白骨便成塵

黃河千里扼兵衝虞虢分明在眼中為向淮西諸將道

不須誇說蔡州功

此為宋助攻
蔡州而發

懷益之兄

世故伊川歎鄉情越客音天宜他日定陸已向來沈冉
冉愁看老源源事益侵誰言易排遣自分不勝任鞭影
驚疲馬鐘聲急莫禽跼中無曠迹喧外有幽尋夢失名

家筆書存遺子金山田和石瘦茅屋過雲深春雨蔬成
圃秋霜柿滿林樹陰涼拂席花氣澹盈襟宿鶯窺晨汲
孤猿伴暝吟溪僧時問字野客或知琴抱璞休奇售臨
觴得緩斟阿一作同兄團聚日曾語一作話百年心

汴禪師自斲普照石

一作瓦

為研以詩見餉為和二首

寺廢瓦不毀研奇功亦多已知良斲少更索苦心何挺
挺剛無敵津津潤可呵羽陽陵谷變冰井字書訛贈比
黃金璞辭慙紫石歌遙知玉音在洗耳俟研磨

長吉有紫石研歌

點化鉛仍見堅凝鐵易穿何年埋朽壤此日睹青天古
色秋煙重哀音夜雨懸有刀堪切玉是鏡不名甄佛塵
淪空劫書林結後緣禪河一勺水更擬就師傳

癸巳除夜

鼎定周元重薪安漢已然不隨南渡馬虛泛北歸船身
竝枯蜩化心爭脫兔先塵埃嗟落泊光景強留連往事
青燈裏浮生白髮前更殘鐘未動猶屬出京年

病中

病因食豬動氣而作癸卯
四月二十一日晨起書

戰勝頗自恃寧知從外腴文章工作崇時運迫推枯止

酒嗟何及燒豬本不圖膏粱無急變山澤有真臞詩信

藤條戲方遭鐵彈誣鹽

去聲

紅忘後顧鰲黑見前驅眩入

投牀仆晨淹伏枕呼萬錢惟嘔泄一嚮爾乘除靜伏心

仍憊深調息亦羸跼嫌囚宇宙渴憶卷江湖風柳留蟬

蛻霜松映鶴派養和懲往失

几名養和事見天隨子詩

扶老念時須

杯杓歸神誓垣牆任佛踰回蹊且垂翅望或在桑榆

老樹

老樹高留葉寒藤細作花沙平時泊鴈野迴已攢鴉旅
食秋看盡行吟日又斜干戈正飄忽不用苦思家

陽翟道中

長路伶俜裏羈懷蒼莽中千山分晚一作落照萬籟入秋

風頻見參旗縮虛傳朔幕空故園歸未得細問北來鴻

太室同希顏賦

壯矣崧維嶽盤盤上窅冥中天瞻巨鎮元氣有遺形雨
入秦川黑雲間楚岫青鼇掀一柱在萬古壓坤靈

送登封張令西上

罷縣人稱屈悠悠復此行渭城秋鴈到秦嶺莫雲平道
路衣從典風塵劒已鳴山西多俠客莫說是書生

送曹吉甫兼及通甫

意氣羨君豪憐君屈騎曹安能事筆硯且復混弓刀風
雪貂裘暗闕山馬骨高南飛見鴻鴈應為惜哀勞

勝槩

三鄉作

勝槩煙塵外新詩杖屨間偶隨流水去澹與暮雲還吾

道三緘口時情一解顏從今便高卧已負半生閒

少室南原

地僻人煙斷山深鳥語譁清溪鳴石齒暖日長藤芽綠
映高低樹紅迷遠近花林間見雞犬直擬是仙家

落魄

落魄宜多病艱危更百憂雨聲孤館夜草色故園秋行
役魚鱸尾歸期烏白頭中州遂南北殘息付悠悠

長壽新居

同仲
經賦

地古邨墟迴川迴縣郭斜蒲池餘老節菊水引夫新芽

卜築欣成趣歸耕覺有涯迎門顧兒女今日是山家

十二月六日二首

俵鬼跳梁久羣雄結構牢天機不可料世網若為逃白

骨丁男盡黃金甲第高閭門隔九虎休續楚臣騷

海內兵猶滿天涯歲又新龍移失魚鼈日食鬬麒麟草

棘荒山雪煙花故國春聊城今夜月愁絕未歸人

短日

短日礎聲急重雲鴈影深風霜侵晚節天地入歸心零
落溝中斷酸嘶爨下音五年朝與夕清血幾沾襟

送楊次公兼簡秦彥容李天成

海國山如染雲堆草易荒時危頻虎穴路絕更羊腸
影雙蓬鬢攜家一藥囊殷勤秦與李無惜借餘光

倪莊中秋

巳亥

強飯日逾瘦袂衣秋已寒兒童漫相憶行路豈知難露
氣入茅屋溪聲喧石灘山中夜來月到曉不曾看

陽興砦

亂石通樵逕重岡擁戍城山川帶淳朴雞犬見升平雨
爛沙仍軟秋偏氣自清年年避營馬幾向北中行

隰州
入府

避騎兵奪馬
者多緣此路

聚仙臺夜飲

永夜留歡席高懷遠市塵月涼衣有露風細酒生鱗鄉
社情親舊仙臺姓字新殷勤詩卷在長記坐中人

九月晦日王邨道中

金方田人卷二
水涵沙仍溼霜餘草更幽煙光藏落景山骨露清秋坐
食知何益行吟只自愁隨陽見鴻鴈三歎惜淹留

十月四日往闕南

行路見新月獨行還獨謠勞生塵衮衮晚色鬢蕭蕭野
曠無遺穗林疎有墮樵回頭麥山嶺更覺馬蹏遙

和仲梁

林影兼秋薄雲陰帶晚涼石潭魚近藻沙渚鴈留

一作舍

霜笑語無長路登臨豈異鄉一尊堪共醉惜不是重陽

感事

壯事本無取老謀何所成人皆傳已死吾亦厭餘生
潦倒封侯骨淹留混俗情百年堪一笑辛苦惜虛名

同冀文明秀山行

莫景披橫幅山間二老同雲如愁戍苦雪亦笑詩窮古
木凍欲折斷崖行復通從今胡谷夢時到水聲中

庚子三月十日作

殘夢忘書帙餘寒殢酒杯青銅元嬾照白紵更寬裁水

際時獨往花邊知幾迴殷勤雙語燕應自謝家來

八月并州鴈

三鄉
時作

八月并州鴈清汾照旅羣一聲驚晚笛數點入秋雲滅
沒樓中見哀勞枕畔聞南來還北去無計得隨君

甲寅十二月四日出鎮陽寄宰魯伯

潯水曉光動灞橋詩境同衝寒騎瘦馬認影識衰翁長
路風聲裏孤城雪意中迴頭歌笑處淒絕意何窮

乙卯十一月往鎮州

邛靜鳥聲樂山低鴈影遙野陰時澗朗冷雨只飄蕭涉
遠心先倦衝寒酒易消紅塵忘南北渺渺見長橋

同姚公茂徐溝道中聯句

路轉川塗闊天低雨氣昏
縣山連漢壘汾水入并門
姚來往頻鞍馬登臨負酒尊
聯詩強一笑淒絕恐銷魂
元

咏懷

崧山
中作

涼葉蕭蕭散雨聲虛堂浙浙掩
霜清黃華自與西風約
白髮先從遠客生吟似候蟲秋更苦
夢和寒鵲夜頻驚

何時石嶺關頭路一望家山眼暫明

帝城

史院夜直作


帝城西下望孤雲半廢晨昏媿此身世俗但知從仕樂
書生只合在家貧悠悠未了三千牘碌碌翻隨十九人
預遣兒書報歸日安排雞黍約比鄰

僕射陂醉歸即事

多生曾得江湖樂每見陂塘覺眼明詩酒共尋前日約
風陰新自夜來晴春波澹澹沙鳥沒野色荒荒烟樹平

醉踏扁舟浩歌起不須紅裏出重城

是日招樂府不至



元詩選初集卷二